

En de Provinz va Trea't de presidenz va ARGE ALP 2024/25

Va de 25 van schanmikeal 2024 finz as de 24 van schanmikeal 2025 de autonome Provinz va Trea't bart sai' president van ARGE ALP, de òrbetgamoaschòft van alpine region. De presidenz ist kemmen gem bail de 55^a konferenz van Arge alp, as hòt se gahòltn ka de Gottardo Arena va Ambri, 50 km nordlech va Bellinzona, bo der Canton Ticino, as ist president finz iaz gaben, hòt gem de presidenz en de Provinz va Trea't. Ver de inser provinz sai' gaben de vicepresidenten va de Autonome Provinz va Trea't Francesca Gerosa, zòmm pet en viarer van Dinst ver de Sprochminderhaitn ont de ausbendegen nètzn Elisabetta Sovilla. Arge Alp ist an òrbetgamoaschòft as ist kemmen gamòcht en 1972 en Mösern, en Tirol, pet en zil za òrbetn no ont unterstütztn de neat van lait ont van 10 lander as nemmen en toal: Taitschlont pet en Freistaat Bayern, Österreich pet de Länder Vorarlberg, Tirol ont Salzburg, Batschlont pet de Autonome Provinzn va Poazn ont Trea't ont de Region Lombardia, de Schbaiz pet de Kantonen Graubünden, St. Gallen ont Ticino. De gamoaschòft enteressart ungefer 26 milionen va lait. Gerosa hòt toalganommen pet òndra dersteller van 10 region va ARGE ALP en de 55^a Konferenz van viarer va regiarung. Bail en trèff ist kemmen vourstellt en de toalnemmer a relazion as de regiarung van bolf van an untersuach van Land Tirol. No en de vourstell hòt klòfft de vicepresidenten Gerosa as hòt pfrok za nemmen vour nèt lai der bolf ober de pern aa en de unersuachen van Arge alp ver za òrbetn òlla zòmm asn doi tema. De hòt pfrok za meing klòffen òlla zòmm van per bavai de noat ist za sai' òlla zòmm abia Alpn za òrbetn asn doi tema, hòt tsòck de vicepresidenten. De derstell va Arge Alp, vour za riven de konferenz, hom uganommen zboa risuluzionen. De earste keart

um en tema as ist kemmen tscherlt va de presidenz Canton Ticino 2024/2024 as ist s sèlber regiar van bösser, as ist an bichtegen element ver za derhòltn s lem as de Alpn. Der tèckst va de risuluzion sok as ist runt bichte tauschen se s kenn zbischn de alpinen regionen ont vourtrong naia ideen. Iherhaupt en doi moment, as ist runt bichte der tema van bëcksl van klima, der zil ist za vinnen virm za meing prauch Schubet ont praktisch en vòll van noat. De zboate risuluzion keart aa um en tema van bëcksl van klima: s klòfft va de zòmmòrbet za nidern s riskiarn en de lander van Alpn ont za vinnen a strategi za tea' se mithèlven. Der Zòmmtrèff van Stòtt Viarer van ARGE ALP hòt derno uganommen an dokument asn tema va de makroregional strategi ver de Qusalp va de EU. Zanleisn va de konferenz, hòt se gahòltn de praisaustol van prais ARGE ALP 2024: s praisgericht hòt austschau 19 projekt asn tema van aushòltlegregiar van bösser ont hòt s gem de prais en earsn drai. Der earste prais ist kemmen gem en de Scuola Specializzata Superiore di Tecnica va Bellinzona ver en projekt van vèrrregiar van bösser van prinn; der zvaite prais en de schual va de Lombardia Gargano ADV ver en projekt "AquaGuardi - Il Guardiano Digitale dell'Acqua"; der dritte prais en Sudtiroler Bauernbund ver en projekt "Wasser Pilot - Verpesser van bassern en de bisn-, pauer-, frucht- ont ba'merbirschòft". Der tema van 2025, as bart kemmen vourstellt van Trentin, bart sai' de projekt va lem, orbet ont bèrkn van jungen as lem en pernglander.

LORENZA GROFF

EN TICINO HÒT SE GAHÒLTN DE 55^a KONFERENZ VAN DERSTELLN VAN 10 LANDER AS NEMMEN TOAL EN DE ÒRBETGAMOASCHÒFTN VAN ALPN. VER DE INSERT PROVINC IST GABEN DE VICEPRESIDENTEN GEROSA.



Druckont PAT

Tolgamoaschòft : zboa bandi ver de studentn

DE SÈLLN AS SAI' ENTERESSART MEING VINNEN DER MODELL VA DE VROG AS DE INTERNETSAIT VAN OMT



La Comunità di Valle Alta Valsugana ha indetto due bandi per borse di studio e facilitazioni di viaggio per gli studenti. La domanda va presentata al Servizio Programmazione e Diritto allo studio della Comunità Alta Valsugana e Bersntol entro mercoledì 4 dicembre

De Tolgamoaschòft Hoa Valzegu' ont Bersntol hòt garo ausgaleik zboa bandi ver de studentn. Der earste ist an prais ver de peistn studentn, der ònder ist a zuazol as kimm en gem ver en sèll as se spendiarn za gea' za schual. Ver za meing ogem de vrog, de enteressaretn miasn gea' derèckt en sitz va de Tolgmoaschòft pet òlla de dokumentn. Der bando ont der modell va de vrog, mu men sa vinnen af de internetisait va de Tolgamoaschòft, en òlla de gamoa'n, en sitz va de tolgamoaschòft odr de meing pfrok kemmen pet an e-mail.

Men mias ausvilln de dokumentn pet òlla de datn, der stònt va de familia, de schualont asou envire. Der prais kimm ausgem no en drai kritern: de punktn van student en de schual, der stònt va de familia ont de kostn ver za gea' za schual. Der zuazol kimm gem ver en sèll as men spendiarn ver de schual: de kostn za gea' za schual, de piacher, sèll as men praicht za schraim se inn oder ver a zimmer ont za èssn ont asou envire. Ver za meing nemmen toal de studentn miasn lem en a Gamoa' va de Tolgamoaschòft Hoa Valzegu' ont Bersntol, hom finz as 20 jor, inntschrim sai' ver en earste vòrt en de sèll klasse ont hom an rèchten Icef (as miasn sai' zbischn 0,00 ont 0,3529). Der ònder bando ist kemmen gamòcht ver òlla de sèlln as miasn nemmen der auto oder an privatn pulmin ver za gea' za schual oder za nemmen de koriara (der plòtz bo as geat

virpai de koriara oder de schual miasn almen aboa kilometre vèrr van haus van student sai'). De kritern ver za nemmen toal sai' de glaichen: lem en a Gamoa' va de Tolgamoaschòft Hoa Valzegu' ont Bersntol, hom finz as 20 jor ont drinn stea' en Icef. De zuazol kimm gem en de sèlln as gea' pet en sai' auto ont en de sèlln as zoln se sèlber an pulmin. Men schauk òlbe der Icef va de familia, de kilometre as men mòcht pet en auto ont der numer van roasn. Ver za nemmen toal en peada de bandi, de studentn hom bail finz as de 4 van schantònderer um zeichena vra. Abia tsòck mias men vouraud de dokumentn ausvilln, dora u'mèln se en sitz va de tolgamoaschòft ont dora gea' ont mòchen de domanda zòmm pet an u'stèllt va de tolgamoaschòft.

LORENZA GROFF

Kennen de bersntoler gamoa'schòft

S IST GARIFT DER PROJEKT VAN SCHUALER VA DE "ANDREATA" VA PERSN

De Zboateschual "C. Andreata" va Persn, bo as gea' de jungen van inser tol aa, hòt toalganommen en projekt "Kennen de bersntoler gamoa'schòft," as ist kemmen organisiart ver za kennen se pesser en de schual ont abia gamoa'schòftn ont ver za kennen de umbèlt as nèt asou vèrr ist. Der projekt as ist garo garift ist kemmen enviretrong van mitòrbeter van Bersntoler Kulturinstitut ont va de Gamoa' va Palai un Bersntol. Laischiar òlla de drauhundert schualer hom toalganommen en projekt as hòt vour gahòp za kennen de gschicht, de sproch, de kultur ont de umbèlt van tol pet an programm as ist ònders gaben ver an iata klasse van schualer. De earstn klassn hom gameicht kennen, gèlsgott aa en heffl "Do glaim en Bersntol", de gschicht van de inser gamoa'schòft, de òrbet van pauer, de òrbetn en bòlt, de sog van Rindel. De zboatn klassen homgameicht pasuachen de ausstell "Klòffen, sprechen, parlare, durch s bersntolerisch" ver za meing studiarn de sproch. Derno sai' sa gòngen za pasuachen der Filzerhof ont de hom gamicht kennen òndra temen abia de òrbetn ont de familia. De schualer van drittn klassn hom studiart zboa bichtega temen ver de inser gamoa'schòft: s hòndl ont de gruam. De hom gameicht gea' za sechen de museen s Pèrgmandlhaus ont de Gruab va Hardimbl.

LORENZA GROFF

